

## Datganiad i'r wasg

**Dyddiad:** 8 Awst 2006

**Teitl:** CEFNOGAETH GENEDLAETHOL I HYBU AMRYWIAETH YN EIN PRIFYSGOLION

Mae'r corff sy'n gyfrifol am gyllido addysg uwch yng Nghymru wedi cyflogi cydgysylltydd cenedlaethol cyntaf Cymru i helpu prifysgolion a cholegau i roi eu polisïau ar amrywiaeth ar waith.

Bydd Cydgysylltydd Anabledd ac Amrywiaeth Cyngor Cyllido Addysg Uwch Cymru (CCAUC) yn gweithio'n agos â sefydliadau addysg uwch Cymru i roi cymorth ymarferol ac arweiniad iddynt ar sut orau i wneud cyfle cyfartal yn realiti i fyfyrwyr – a bydd yn chwarae rhan bwysig mewn llunio polisïau CCAUC ym meysydd anabledd ac amrywiaeth yn ystod y tair blynedd nesaf.

Mae Vikki Burge, sydd â bron 10 mlynedd o brofiad o weithio ym myd addysg, yn fwyaf diweddar fel swyddog uwch â chyfrifoldeb dros reoli gwasanaethau anabledd a mynediad, yn edrych ymlaen at yr her newydd. Mae hi'n gobeithio y bydd y prifysgolion a cholegau yn gweithio gyda'i gilydd ac yn rhannu profiadau myfyrwyr anabl ac adnoddau ar eu cyfer, a hynny ar adeg pan ydynt yn paratoi eu Cynlluniau Cydraddoldeb Anabledd cyntaf erioed.

Meddai Vikki, sy'n gweithio o swyddfa CCAUC yn Llanisien, Caerdydd:

'Rydw i'n ysu am ddechrau gweithio gyda'r prifysgolion a cholegau yn fy swydd newydd. Rydw i'n argyhoeddedig y gellir cyflawni cymaint yn fwy drwy fabwysiadu'r agwedd gydlynol hon at amrywiaeth mewn addysg uwch a chael adnodd canolog y gall yr holl sefydliadau fanteisio arno.

"Mae'r sefydliadau addysg uwch wedi gwneud gwelliannau aruthrol i'r gwasanaethau sydd ar gael i fyfyrwyr anabl yn ystod y blynyddoedd diwethaf. Gallwch weld hyn drwy edrych ar ddangosyddion perfformiad diweddaraf yr Asiantaeth Ystadegau Addysg Uwch. Dangosant fod sefydliadau yng Nghymru'n recriwtio cyfran uwch o fyfyrwyr sy'n derbyn y Lwfans Myfyrwyr Anabl na'r Deyrnas Unedig at ei gilydd.

“Er bod hyn yn newyddion gwych, rhaid i ni wneud rhagor o waith i wthio materion anabledd ac amrywiaeth i fyny'r agenda yn ein prifysgolion a cholegau drwy weithio ag uwch reolwyr i gynyddu cyfleoedd i'r holl fyfyrwyr – a staff – i'r eithaf, beth bynnag yw eu cefndir.

“Rydw i wrth fy modd gyda'r swydd newydd hon, a rydw y'n edrych ymlaen at weithio gyda'r sector i wneud cyfle cyfartal yn realiti i fyfyrwyr.”

Diwedd.

### **Cysylltiadau yn y cyfryngau**

#### **CCAUC**

Emma Rączka, Rheolwr Cyfathrebu - 029 2068 2225.

Dale Hall, Pennaeth Cynllunio a Rheolaeth Gorfforaethol - 029 2068 2280.

#### **Cefndir – CCAUC**

Corff Cyhoeddus a Noddir gan y Cynulliad yw Cyngor Cyllido Addysg Uwch Cymru (CCAUC). Fe'i sefydlwyd ym mis Mai 1992 a daeth yn gyfrifol am gyllido addysg uwch yng Nghymru ar 1 Ebrill 1993.

O dan Ddeddf Addysg Bellach ac Uwch 1992, mae'r Cyngor yn gyfrifol am weinyddu'r cyllid a roir gan y Cynulliad i gynnal yr addysg a ddarperir a'r ymchwil a wneir gan sefydliadau addysg uwch a chyrsgiau addysg uwch penodedig a ddarperir mewn sefydliadau addysg bellach.

O dan Ddeddf Addysg 1994, mae'r Cyngor yn gyfrifol am achredu darparwyr hyfforddiant cychwynnol ar gyfer athrawon ysgol ac am gomisiynu ymchwil i wella safonau athrawon a hyfforddiant athrawon.

Yn ogystal â'i gyfrifoldebau cyllido, mae'r Cyngor yn cynghori Cynulliad Cenedlaethol Cymru ar anghenion ariannol, dyheadau a phryderon y sector addysg uwch yng Nghymru.

Cwrt Linden  
Clos Ilex  
Llanisien  
Caerdydd  
CF14 5DZ

Cyngor Cyllido Addysg  
Uwch Cymru  
Higher Education Funding  
Council for Wales

**hefcw**

Ffôn 029 2076 1861  
Ffacs 029 2076 3163

**[www.hefcw.ac.uk](http://www.hefcw.ac.uk)**